

## REVISTA SITUASAUN ABRIL-MAIU 2019

Sistema Atensaun no Responde Sedu (AtReS) estabese ona liu tinan 10 husi 2008 to'oma agora ho hala'o servisu monitorizasaun insidente violénsia ne'ebé akontese iha Munisipiu sira.. Sistema ne'e uza rede parseria monitorizadór iha baze ba halibur informasaun insidente violénsia. Monitorizadór sira ne'e treinadu atu verifika no haruka dadus insidente violénsia ba koordinadór Munisipiu sira no kontinua haruka dadus liu husi tablet komputadór, koordinadór Munisipiu haruka ba sistema baze dadus nasionál ho sistema online. Fulan 2 dala ida Belun halo relatóriu Revista Situasaun, karik maluk sira iha interese ba dadus insidente violénsia ne'ebé akontese iha Timor-Leste, bele asesu [www.atres.belun.tl](http://www.atres.belun.tl)

Revista situasaun periodu Abril-Maiu 2019, inklui Munisipiu Dili. Iha Fulan Abril 2019 kontinua monitorizasaun iha Postu Administrativu 6 iha Munisipiu Dili. Sistema AtReS periodu ne'e dadus monitorizasaun kobre ona iha Postu Administrativu 16 husi iha Munisipiu 4, hanesan Baukau, Covalima RAEAO no Dili. Parseiru monitorizadór hamutuk na'in 16 (feto 11 no mane 5), kada Postu Administrativu (PA), monitorizadór na'in ida. Sistema AtReS rekolla dadus insidente iha munisipiu 4, tanba ne'e número dadus insidente sae iha periodu fulan Abril-Maiu 2019 kompara ho número insidente iha fulan Feveireiru-Marsu 2019

### ASUNTU NE'EBÉ PRESIZA TAU ATENSAUN

- ▶ **Insidente ho kauza laran moras, Ódio vingansa no problema pasadu hamutuk 60;**
- ▶ **Violénsia Doméstika (VD) kontinua akontese hamutuk 50;**
- ▶ **Insidente violénsia husi membru Eis-Grupu Arte Marsiais (GAM), hamutuk 17;**
- ▶ **Violénsia Bazeia ba Jéneru (VBJ) Aseidu seksual, Raptu akontese hamutuk 4;**

### REKOLLA INSIDENTE VIOLÉNSIA HAMUTUK 158 IHA PERIODU FULAN ABRIL-MAIU 2019

Belun ho nia Sistema AtReS iha periodu Abril-Maiu 2019 rekolla dadus insidente violénsia jerál hamutuk 158 número insidente ne'e sae 20%, kompara ho dadus fulan Feveireiru-Marsu 2019 hamutuk 96. Número insidente refere sae iha periodu ne'e, tanba sistema AtReS reativa tan Monitorizasaun iha Munisipiu Dili.

Husi total número insidente iha tabela, 32% insidente akontese iha Baukau, 30% insidente akontese iha Munisipiu Dili, 25% akontese iha RAEAO no 13% insidente akontese iha Munisipiu Covalima. Insidente 158 autor mane 123, autór feto 16, autór feto no mane 10 no autór deskoñesidu ema nain 9. Autor nia profisaun maioria husi membru família hamutuk insidente 60, viziñu 42, to'os ka animal nain sira 42, membru família sira ne'ebé hela uma ketak 39, estudante 22, membru Eis-GAM 20, dezempregu 15, membru PNTL 3, membru veteranu 1, ofisiál Governu 3, ema deskoñesidu 4, ema estranjeiru 1 no seluk. Vítima husi insidente ne'e, mane 75, feto 48, feto no mane 31. Iha mós vitima la hatene (estrage sasán ka propriedade sira) hamutuk 4. Issue ka kauza insidente ho violénsia kontinua trend ka sae makas iha periodu monitorizasaun ne'e mak hanesan, Violénsia Bazeia ba Jéneru (VBJ) inklui violénsia doméstika, aséidi seksuál, raptu, laran moras no ódio vingansa ba malu no problema pasadu, vitima no autor ho kondisaun tua lanu, insidente entre membru Eis-GAM, dun malu buan ka uza kaer ai-kulit, lori lia bosok, lia fetosa-umane (lisan Kultura), problema liga ba

animal, iha mos insidente liga ba polítika governu, no seluk tan. Impaktu husi insidente ne'e mane na'in 2 mate, feto na'in 2 mate, mane na'in 18 kanek todan, feto na'in 1 kanek todan, mane kanek kmaan na'in 29 no feto 19, ema halai husik hela fatin iha insidente 8, iha mós estrage uma, sasán, transporte inklui oho mate animal 4 no seluk tan.

### VIOLÉNSIA DOMÉSTIKA (VD) KONTINUA AKONTESE HAMUTUK 50

Dadus insidente liga ho violénsia Doméstika kontinua akontese iha Munisipiu Baukau, Covalima, RAEAO no Dili, ho total hamutuk insidente 50, número ne'e sae 13% kompara ho revista situasaun periodu fulan Feveireiru-Marsu 2019 hamutuk insidente 38. Violénsia Doméstika maioria akontese iha Munisipiu Baukau 21, RAEAO 17, Dili 7 no Covalima 5. Kazu Violénsia Doméstika (VD), Kuaze Insidente hotu kona-ba violénsia doméstika autoridade prosesu nafatin tuir Lei nú. 7/2010 kona ba Lei Kontra Violénsia Doméstika (LKVD) ne'ebé iha, ne'e hatudu katak, autoridade Komunitária iha ona koñesimentu di'ak ba LKVD hodi prosesu kazu violénsia Doméstika (VD). Tuir mai insidente VD ne'ebé akontese iha fulan Abril-Maiu 2019 hanesan:

- ▶ Iha dia, 03 Maiu 2019, oras 23:00 kalan, Postu Cristo Rei, Munisipiu Dili. Akontese inan ho aman istori malu halo impaktu ba oan mane lori ai-suak baku mate ni'an aman. Insidente ne'e akontese bainhira vítima (la'en) haruka fen atu oho manu modo ba han, maibé fen la hatán entaun sira istori malu no fen lori kanuru suru rai-henek atu baku nia la'en, maibé nia hadau no ameasa fali nia fen, nune'e fen ta'uk hodi hakilar. Oan mane rona nia inan hakilar, nune'e oan mane halai sai husi kuartu lori ai-suak besi baku nia aman iha ulun to'oma aman mate iha fatin. Kazu ne'e polísia kaptura ona oan nu'udar suspeitu no rejistu ona iha Polísia. Impaktu husi insidente ne'e polísia kaptura Inan no oan ba sela polísia 24 oras, ikus mai inan sai ona husi sela maibé oan tama iha sela prizaun Bekora hodi hein prosesu investigasaun no julgamentu.
- ▶ Iha dia, 26 Maiu 2019, oras 10:50 kalan, iha postu administrativu Suai, Munisipiu Covalima, Akontese la'en ho kondisaun lanu halo asalta fíziku hodi chock motor baku nia fen too mate. Insidente ne'e akontese bainhira la'en hemu tua lanu depois fila ba uma hodi baku nia fen mate no oan hetan kanek todan iha ulun, hafoin autór ba entrega an iha komandu Polísia Covalima, Iha tempu hanesan PNTL mós ba iha fatin akontesimentu lori vítima ba Ospital referral Suai hodi halo autópsia no halo tratamentu ba oan ne'ebé hetan kanek. Impaktu husi insidente ne'e fen mate iha fatin, oan kanek. Insidente ne'e agora prosesu ona iha parte Polísia no kompetente tuir lei ne'ebé vigór.

### INSIDENTE HO KAUAZ LARAN MORAS KAUAZ ÓDIO VINGANSA BA MALU HAMUTUK 60

Periodu fulan Abril-Maiu 2019, Insidente ho kauza ódio vingansa, laran moras ba malu tanba problema Pasadu hamutuk insidente 60, número insidente sae 27%. Kompara ho periodu fulan Feveireiru-Marsu 2019 ho total 33. Insidente sae tanba sistema AtReS aumenta monitorizasaun tan iha Munisipiu Dili. insidente ne'ebé iha ligasaun ho kauza laran moras, ódio vingansa ba malu tanba problema pasadu kontinua akontese ho número insidente ne'ebé a'as mak hanesan:

- ▶ Iha dia, 4 Maiu 2019 maizumenus tuku 09.20-dadeer iha Sub Rejiaun Pante Makassar RAEAO. Insidente akontese insultu malu entre juventude. Insidente ne'e mosu tanba iha joven na'in tolu hein hela estudante na'in ida hodi baku, razaun tanba joven na'in tolu

laran moras hela tanba iha serimónia festa kore metan iha loron rua liu ba akontese hadau malu fetu uainhira atu dansa, ho nune'e mak joven na'in tolu sente la satisfetu hodi diskute malu ho estudante ne'e no asalta fíziku baku estudante ne'e hodi rezulta hetan kanek iha ibun no oin bubu. Kazu ne'e hetan akalma husi PNTL no bainhira parte seguransa too iha fatin akontese joven sira halai husi fatin. Kazu nee vítima refere ona ba PNTL hein prosesu.

- ▶ Iha dia, 30 Maiu 2019, Maizumenu tuku 12:30 meidia. Iha aldeia São Jose Aimetí laran, suku Comoro, Postu Administrativu (PA) Dom Aleixo. Akontese estudante halo problema ba malu tanba ódio vingansa no membru F-FDTL mak sai vítima. Insidente ne'e akontese bainhira estudante sira ataka malu iha estrada públiku, iha tempu hanesan membru F-FDTL mós liu iha area refere ho nia karreta privadu no membru F-FDTL ne'e hetan tuda husi estudante sira, La satisfás ho hahalok estudante ne'e mak membru F-FDTL ho nervozu tun husi karreta no kaer estudante na'in 10 resin entrega ba PNTL hodi ba sela polísia. Kazu daudauk sei iha prosesu tuir lei ne'ebé iha.

Husu PNTL presiza kontinua hala'o seguransa másimu hanesan patrollamentu iha tempu kalan no halo atuasaun ho profesionál hala'o knaar ba garante Lei no Orden hodi asegura comunidade buka lia lós, tanba dadus 15 hatudu katak autor husi ema deskoñesidu susar atu deteta autór sira. Fator balun aumenta ódio vingansa tanba laran moras ho problema pasadu husi kazu pendente barak iha tribunal prosesu lao neineik, halo ema aumenta laran moras no ódio vingansa ba malu. Husu comunidade no sociedade Timor Leste atu la bele ta'uk fahé informasaun ba autoridade seguransa no promove atividade kultura ba paz no dame hodi hametin unidade kria estabilidade ne'ebé seguru iha hodi espasu ba dezentvolvimentu iha ita sociedade Timorensé.

#### INSIDENTE VIOLÉNSIA HAMUTUK 17 HAMOSU HUSI MEMBRU EIS-GRUPU ARTE MARSIAIS (GAM)

Asaun violénsia entre membru eis-Grupu Arte Marsiais (GAM) sei kontinua akontese, número insidente sae 41% iha fulan Abril-Maiu 2019 ne'e, kompara ho revista situasaun periodu fulan Fevereiro-Marsu 2019 hamutuk 3. Membru eis GAM nafatin hamosu insidente 17 iha periodu ne'e, insidente akontese 9 iha Munisipiu Baukau, 5 iha Dili no 3 iha Covalima. Entretantu RAEOA livre husi insidente liga ho eis-GAM. Insidente ne'ebé hamosu iha ligasaun ba malu mak hanesan:

- ▶ Iha dia, 25 Maiu 2019, dadeer tuku 9:00, iha merkadu Oralan Suku Vemasse, PA Vemasse, munisipiu Baukau. Bainhira joven mane ida ba merkadu atu sosa modo, too iha merkadu husu joven mane sira seluk, *"tanbasá mak ita mesak kolega deit maibé imi odio ha'u?"* vitima mós hatan katak *"hau la hatene buat ida"*. Nune'e derrepente deit autór asalta fízika tebe no tuku vitima mane seluk, Insidente ne'e rejistu ona iha eskuadra Polísia PA Vemasse hodi prosesu tuir Lei.
- ▶ Iha dia, 25 Maiu 2019, tuku 4:00 lokraik. Iha Aldeia Bahamori, Suku Cai-Cua, Postu Administrativu Vemasse, Munisipiu Baukau. Akontese membru eis-grupu arte marsiais IKS ho PSHT halo asaltu fíziku ba malu tanba laran moras ka odi vingansa problema ho

GAM ne'ebé liga ho insidente pasadu. Impaktu husi insidente ne'e ema ida mate, kanek fetu na'in 2, sunu uma 1 no estraga uma 4. Iha mós Impaktu seluk mak comunidade jerál la hala'o nia atividade tanba la seguru inklui estudante sira mós labele tuir atividade aprendizajen iha eskola. Kazu ne'e rejistu ona iha Polísia eskuadra PA Vemasse no autór balun submete ona ba prosesu investigasaun.

- ▶ Iha dia, 25 Maiu 2019, maizumenu tuku 4:30 lokraik. Iha Aldeia Bahamori, Suku Cai - Cua, PA Vemasse, Munisipiu Baukau. Akontese membru eis grupu arte marsiais IKS taa membru eis-grupu arte marsiais PSHT na'in 2 tanba laran moras ka odi vingansa kona- ba problema GAM. Impaktu husi insidente joven traballadór kompañia China ida ema taa kanek. Kazu ne'e rejistu ona iha PNTL eskuadra PA Vemasse hodi halo investigasaun.
- ▶ Iha dia 27 Maiu 2019, maizumenu oras 09:27AM. Iha Aldeia Bahamori, Suku Cai-Cua, PA Vemasse, Munisipiu Baukau. Impaktu husi insidente ne'e halo comunidade ta'uk no preokupadu inklui atividade aprendizajen estudante sira mós la la'o. Kazu ne'e rejistu ona iha Polísia eskuadra PA Vemasse hodi prosesu tuir lei.

Insidente iha leten hatudu katak, membru Eis-GAM ne'ebé Governu bandu ona kontinua odiu vingansa ba malu. Impaktu husi insidente ema mate, kanek todan, estraga comunidade nia propriedade, relasaun ba malu no comunidade tauk no trauma. Maske Lei No. : 5/2017 kona-ba Arte Marsiais no Arma branka iha ona, maske GAM ne'ebé bandu la iha ona atividade, maibé membru eis-GAM kontinua halo Injustisa entre joven, membru GAM.





#### VIOLÉNSIA BAZEIA BA JÉNERU (VBJ) ASEIDU SEKSUAL, RAPTU AKONTESE HAMUTUK 4

Insidente liga ho kauza husi Violénsia Bazeia ba Jéneru (VBJ) iha fulan Abril-Maiu 2019, hamutuk insidente 4, ne'ebé akontese Insidente 2 iha Munisipiu Baukau, Insidente 2 seluk akontese Dili no RAEOA. Autór husi insidente ne'e kuaze mane hotu. Insidente Violénsia VBJ tun 17% kompara ho fulan Fevereiro-Marsu 2019. Insidente VBJ maka hanesan tuir mai ne'e:


- ▶ Iha dia 23 Abril 2019 maizumenu 07.00, iha Sub Rejiaun Passabe RAEOA, akontese diskute malu entre autór no labarik minoridade sira ho vítima (sobriñu), tanba asuntu hare film Pornografia. Insidente ne'e mosu hahú husi autór tuur hamutuk ho labarik mane minoridade sira, maizumenu ema nain 2-5, nonton iha Kuartu laran no autór hasai filmajem pornografia liu husi telemovel. Nune'e iha prosesu haree filme ne'e, la sente iha sobriñu mane ida mai hafuhu hodi hare asaun ne'ebé mak autór halo ba vítima sira. sobriñu sente la satisfás hakbesik ba husu telemovel ne'ebé mak autór uza, maibé labarik minoridade sira lakohi atu fó telemovel inklui autor nu'udar telemovel nain. Tanba la simu autór nia hahalok mak sobriñu ba keixa no refere kazu ne'e ba Polísia hodi mai kaptura autór no lori ba halo investigasaun. Kazu ne'e iha ona PNTL hein prosesu tuir mai.
  - ▶ Iha dia 02 Maiu 2019, maizumenu moras 09:00 dader. Iha Postu Administrativu Baukau, Munisipiu Baukau. Akontese mane kasadu ida halo asédiu sexual ba fetu kasada ida. Insidente ne'e akontese uainhira fetu kasada ne'e la'o hela iha estrada ninin, derrepente mane kasadu ne'e ho karreta mosu husi kotuk hodi ko'alia ba fetu kasada ne'e dehan ho lia fuan mal tratadu. kazu ne'e rejistu ona iha Polísia eskuadra hodi prosesu tuir lei.
- Kazu VBJ inklui fetu no labarik fetu no mane minoridade sempre hetan no kontinua la sente seguru, tanba sempre hetan violénsia oi-oin ne'ebé hetan iha uma laran no iha sociedade.

Komunidade maioria seidauk hatene di'ak kona-ba prosesu keixa no seidauk brani atu sira bele keixa ba referal kazu VBJ, Maske Governu kria ona polítika no sosiedade sivil luta nafatin kontra VBJ, maibé komunidade seidauk iha sensibilidade ba asuntu refere. Husu atu, presiza fahe nafatin informasaun ba komunidade sira atu nune'e ema hotu iha informasaun naton no ho konsiénsia hodi luta kontra VBJ. Atu se de'it família ka komunidade mak halo hahalok sira ne'e krime no tenke hato'o keixa sei hare ka rona no la bele konsiste sei família rasik.

### KARATERÍSTIKA INSIDENTE




### Impaktu husi Insidente



### Sasan ne'ebe uza iha Insidente



### Kauza Husi Insidente



### ATIVIDADE PREVENSAUN NO RESPONDE KONFLITU

#### Atividade programa Feto Pas no Seguransa (FPS):

Kapasitasaun Komunitade, liu husi programa Feto Pas no Seguransa fasilita treinamentu kona-ba Abilidade Rezolusaun Konfliktu ba participante grupu tárjetu iha Munisipiu Baukau, Covalima no RAEOA. Objetivu husi treinamentu: 1). Atu participante bele iha abilidade no koñesimentu ne'ebé kle'an kona-ba oinsá sai mediadór ida ne'ebé independente no sensível ba jéneru. 2). Hametin diak liu tan kolaborasaun servisu ho parseiru sira no mós bele fasilita mediasaun ruma ba konfliktu ruma ne'ebé akontese iha sira nia komunitade. 3). Atu participante feto fiar an no kreativu hodi buka solusaun no partisipa iha prevensaun konfliktu no harii Pas. Tárjetu husi treinamentu ne'e maka membru grupu feto, Feto Konsellu Polísiamentu Komunitária (feto KPK), membru Rede Prevenaun no Responde Konfliktu (RPRK). Ho total participante iha treinamentu refere: 1), RAEOA Iha dia 09 to'o 11 Abril 2019, hamutuk ema na'in 25 Feto 21 no Mane 4. 2), Munisipiu Covalima dia 09 to'o 11 Abril 2019, ho participante hamutuk ema nian 29 Feto 21 no Mane 8. 3), Munisipiu Baucau iha dia 23 to'o 25 Abril 2019, ho total participante hamutuk 20 feto: 17, Mane: 3.



Iha dia, 24-26 Abril 2019, Belun sai panelista hodi apresenta Belun nia programa AtReS husi Teoria no Pratika importánsia ligasaun ho Atensaun Sedu. Iha Workshop FORUM REGIONAL ASEAN ho Tópiku Jerál Promosaun Pas no Seguransa liu husi Diálogo no kooperasaun iha Asia Pasífiku no Prevensaun Diplomasia no Atensaun Sedu liga ho Rezolusaun Konfliktu. Eventu ne'e hala'o iha Salao Nova Turismo iha Dili, Timor Leste. Hamutuk no Nasaun 26 inklui Timor-Leste ho total partisipante 85. Iha loron ikus 26 Abril 2019, Delegasaun sira hotu halo visita ba munisipiu Likisa hodi halo dialogue hamutuk ho Belun nia rede Prevensaun no Responde Konfliktu (RPRK) ho comunidade sira. Eventu ne'e organize husi MNEC, Embaixada Australia, Embaixada Indonesia, Embaixada America and Embaixada Newzealand.

Iha dia, 15-21 Maiu 2019, Belun nia Jestor Programa FPS, Sra. Marilia Oliveira da Costa partisipa treinamentu kona-ba Fasilitasaun hanesan pratika Lideransa feminista iha Filipina, Quezon City. Iha treinamentu ne'e partisipante mai husi nasaun 10 husi ASEAN.

Belun hetan oportunidade sai membru rejional ba Monitoriza Pas "Regional Peace Monitoring" hamutuk ho parseiru NGO husi nasaun Myanmar, Thailandia, Nepal, Bangladesh husi parseria ho Fundasaun Ázia (TAF) nia Ofisiu Rejional Bangkok. Representante Diretór Belun, Sr. Luis da Costa Ximenes atende enkontru da uluk ho priviléjiu apresenta servisu Belun iha area prevensaun konfliktu, liuliu Belun nia sistema Atensaun no Responde Sedu ka Early Warning, Early Response System (EWER) no Mediasaun no Rezolusaun ba Disputa. Onra boot ba Belun ba parseria ida ne'e hamutuk fasilita husi TAF. Eventu enkontru regular ne'e husi fasilita parseiru TAF iha Sukothai Hotel, Bangkok, 7-8 Maiu 2019 ho prezensa na'in 21 (feto: 8 no mane: 13) husi ativista sociedade sivíl ho foku liu oinsá haforsa parseria ba Sistema EWER ho ida-idak ni'an instrumentu ba monitoriza no mós oinsá uza sosiál media ba advokasia. Eventu diskusaun dame ne'e ho apoiu husi parseiru International Development Research Center (IDRC) husi Governu Canada.



### ATIVIDADE PROGRAMA IHA MUNISIPIU DILI

Iha periodu fulan Abril-Maiu ekipa AtReS ne'ebé hetan fundu husi Asia Pacific Partnership Atrocity Prevention (APPAP) no DAP-DFAT konsege realiza atividade sira mak hanesan, informa reativasaun programa AtReS iha munisipiu Dili ba Administradór postu administrativu neen (6) iha Dili no mós PNTL Unidade VPU. Jerálmente Autoridade sira kontente tanba sistema ne'e la'o fila fali tanba sira koñese ona Belun ho sistema ne'e tinan barak ona. Hafoin programa ne'e reativa fali, Belun nia monitorizador sira hahú fali halo monitorizasaun ba insidente violénsia no mudansa situaun iha Postu Administrativu neen (6) Dom Aleixo, Vera Cruz, Cristo Rei, Nain Feto, Metinaro no Atauro no mos RPRK ne'ebe estabesele ona.

### VIZITA ESPECIAL HUSI SEKRETARIU JERÁL WFUNA MAI BELUN

Iha dia, 27 Abril 2019: Belun ho nia ekipa hetan vizita especial husi Sekretáriu-Jerál WFUNA, Señor Bonian Golmohammadi ho nia ofisiál ba Pás no Seguransa, Señora Margaret Williams.



Objetivu vizita hodi fahé informasaun ba servisu Belun iha area prevensaun konfliktu iha comunidade, seguransa no harii dame. Nomos rona direta programa WFUNA ho planu ba eventu objetivu dezvoltamentu sustentável (ODS) 16+ III Forum Anuál Showcase ne'ebé sei realiza iha fulan Novembru 2019 iha País Timor-Leste. Parte seluk mós diskusaun uitoan kona-ba perspetiva sociedade sivíl ba forum ne'e rasik husi esperiénsia implementa parseiru NGOs sira, inklui planu vizita comunidade ba harii pás ne'ebé comunidade sira rezolve ho dame. Akompañia enkontru ne'e

representa mós husi diretór Dezvoltamentu Internasionál, Señor F. Corbafo husi MNEC ho nia ofisiál sira ho haforsa planu forum anuál III 2019 iha Timor-Leste.

### PROGRAMA KLINIK ASESU BA JUSTISA




NGO Belun liu husi Programa Mediasaun no Rezolusaun ba Disputa servisu hamutuk ho Defensória Pública hodi implementa programa Klínika Asesu ba Justisa (KAJ) iha Munisipiu Judisiál Baukau no Covalima hala'o atividade Mediasaun disputa rai iha periodu fulan Abril-Maiu 2019 ba disputa hamutuk 23, Baukau 11 no Covalima 12. Resultadu mediasaun susesu hamutuk kazu 1 iha Baukau no 1 Covalima. Refere kazu 7 ba Defensória Pública. Kazu

15 iha prosesu kontinua mediasaun.

Iha loron Kuarta feira, 08 de Maiu de 2019, fasilita Mediasaun segundu faze ba kazu disputa rai ida, ne'ebé involve ema indivíduu ho indivíduu hakesuk malu ba rai Baliza ne'ebé lokaliza iha Aldeia Leogore, Suku Ogues, Postu Administrativu Maucatar, Munisipiu Covalima.

Liu husi Mediasaun ne'e, parte rua hetan akordu konkordánsia, no deside hodi hakotu sira nia problema ho konteúdu akordu mak parte Requerido hakarak atu fó osan \$. 500.00 Dollar Amerikanu ba rai ne'ebé Requerido Sukat liu tiha ona ba iha Auto Estrada ninian, ho rai nia luan 5 M no nia naruk 20 M. iha parte suluk Requerente mós hakarak atu simu osan ne'e no konkorda hodi entrega rai ho medida 5x20m<sup>2</sup> ne'ebé sai disputa ba Parte Requeridu. Ho ida ne'e mediador Belun ba



Klínika Asesu Justisa iha Edifísiu Defensoria Pública munisípiu judisiál Covalima fasilita disputante na'in rua hodi asina deklarasaun akordu prosesu ekstra judisiál hodi hatudu katak, problema ne'e hetan ona solusaun no rezolvidu liu husi dalan mediasaun iha Loron Kuarta feira, dia 08 de Maiu 2019.

### BELUN NIA EKIPA

Belun hetan oportunidade sai membru rejionál ba Monitoriza Pas "Regional Peace Monitoring" hamutuk ho parseiru NGO husi nasaun Myanmar, Thailand, Nepal, Bangladesh husi parseria ho Fundasaun Azia (TAF) nia Ofisiu Rejionál Bangkok. Representante Belun, Luis Ximenes ba atende enkontru dahuluk ne'e ho previlijiu aprezena servisu Belun iha area prevensaun konfliktu, liliu Belun nia sistema Atensaun no Responde Sedu ka Early Warning, Early Response System (EWER) no Mediasaun no Rezolusaun ba Disputa. Honra boot ba Belun ba parseria ida ne'e hamutuk fasilita husi TAF. Eventu enkontru regular ne'e husi fasilita parseiru TAF iha Sukothai Hotel, Bangkok, 7 - 8 Maiu 2019 ho prezensa na'in 21 (feto: 8 no mane: 13) husi ativista sociedade sivíl ho foku liu oinsa haforsa parseria ba Sistema EWER ho ida-idak ni'an instrumentu ba monitoriza nomos oinsa uza sosiál media ba advokasia. Eventu diskusaun dame ne'e ho apoiu husi parseiru International Development Research Center (IDRC) no Governu Canada.



### KONA-BA REVISTA NE'E

Revista situasaun ne'e relata kona-ba asuntu xave relasiona ho insidente violénsia no tendensia husi dadus monitorizasaun liu husi Sistema Atensaun no Responde Sedu (AtReS) Timor-Leste durante Abril-Maiu 2019, Revista Situasaun ne'e kobre tan Munisípiu Dili, hamutuk Munisípiu 4 Baukau, Covalima, Dili no RAEOA, Munsípiu 9 seluk Belun nia Monitorizasaun seidak kobre nafatin, tanba iha fulan refere Belun la iha rekursu ne'ebé suficiente atu apoiu ba monitorizasaun rekolla dadus. Belun esforsu atu fahé informasaun ne'ebé up-to-date no serteza ho dadus atual. Hanoin katak, situasaun ne'e bele hetan mudansa ho lalais, ami agradese no simu informasaun seluk ne'ebé bele karifika ka update dadus ne'ebé ami iha liu husi AtReS.

### Informasaun kle'an liu iha [www.atres.belun.tl](http://www.atres.belun.tl)

**Luis da Costa Ximenes**, Diretór, [luis.belun@gmail.com](mailto:luis.belun@gmail.com)

**Marilia Oliveira da Costa**, Jestór Sistema AtReS: [bylah.belun@gmail.com](mailto:bylah.belun@gmail.com)